

学行典

學行典第二百卷

孝弟部名賢列傳二十二

明八 錢靖忠

按寧波府志錢靖忠字獻孟號心訥父若廣坐事下江右獄靖忠與弟益忠敬忠痛力學萬曆戊午靖忠敬忠登賢書天啟初敬忠赴闕訴父冤靖忠益忠則往江右哀懇其鄉大僚劉一鯤鄒元標諸公多方救援父遂得釋益忠訓導瑞安學深養粹育士振民卒於官士民建祠以祀靖忠則以父年老須養竟不赴公車爲人嚴毅侃直凜然不可犯授經於鄉門人已抱子者猶不廢夏楚終身無紛華之好布衣蔬食樂以卒歲鄉人皆敬憚之

武愛文

按寧波府志武愛文字信陵生於世勳家思以科第發身與里中謝渭薛玉衡林繼祖相友善及渭等先後登第而愛文獨浮沈諸生間萬曆丁酉以選貢入南雍旣父母相繼沒哀毀欲絕廬於墓側以過慟致疾卒里人咸稱爲武孝子所著有冰壺詩集

錢敬忠

按寧波府志錢敬忠字孝直號玉塵幼穎悟性真摯父若賡擬重辟羈江西獄敬忠受經獄中業日益進然志專在救父聞有恩赦輒匍匐求援當事不能得則銳意制科業冀博一第或藉之易爲力萬曆己未果得成進士不就廷對而歸熹宗卽位入京先誓神以必死草辨冤疏乞代父死語極悽惻因俯伏禁門外疏下法司議獄者憫之父竟得釋歸然在獄已三十年矣貧無以養謁選得刑部主事未幾丁外艱歸服除補原職會生母病遂乞休崇禎己卯復補前職遷守寧國賑活饑民數萬免官寄居海寧稱崇禎遺老爲人耿介好學出父重獄卒成其志世以此重之

馮有經

按寧波府志馮有經字正之家於直隸之寶坻萬曆己丑進士選庶吉士屢遷庶子兼侍讀以病告休少孤事寡母劉氏以孝聞雖在華膳見母稍不愉輒長跪以請候母色霽方起又痛父首丘未遂母苦節未彰至是奉父櫬及母南還營父葬事畢旋請於朝廷建坊表母節及卒朝廷念講讀勞祭贈如制

王芮

按寧波府志王芮字啟霞父彥宦遊合浦卒於官芮以垂髫迎櫬積雪凍餒號泣幾絕以孝聞薛三省爲傳以紀其事萬曆戊子舉于鄉授興國令陞通州知州賦性敏練判決如流吏無不凜凜奉法尋以疾告歸州人戴之立石紀績焉

董嗣晉

弟嗣昌 嗣昱

按杭州府志董嗣晉嗣昌嗣昱兄弟三人皆海寧諸生大父樹父成身世敦孝友三人益飭躬勵行期不負先訓萬曆乙丑歲凶時五月苦疫父及繼母蔡皆沈疴三生侍疾惟謹七日而母亡三子飲泣事父憂勞益力二十三日晉卒六月一日昱繼卒昌以母兄之痛方殷弟喪之殮更亟時父病轉劇乃割股和藥以進幸服之得蘇乃罄妻奩資具喪殮辦薪水贍弟妹毋傷父心至初五日以盡瘁亦卒里人上其事於督學者旌其閭曰一門三孝

胡文奎

按杭州府志胡文奎餘杭人少失父奉母甚恭萬曆戊午七月十五夜忽雷雨交作山水突至奎聞

亟越房負母避難亦呼婦挈兒急起方離牀牀卽浮甫出戶屋隨漂沒正皇遽間見堆阜有桑株奎卽擎母緣置其上是時婦提幼子疾呼救奎曰我但能救母不能救若等矣遂婦子皆溺死而奎母獲免於難

沈孝子

按杭州府志沈孝子沙村人其名不傳萬曆中山水瀑漲高至丈餘漂廬舍母隨流水去孝子號慟躍入洪流中求母明日於平密鎮逆流上三十里還至沙村二人並死矣里人駭異收葬之至今沙村傳有沈孝子墓云

高林

按嘉興府志高林字宇培膠州守文登長子生而穎慧未冠補湖邑生萬曆戊子歲饑出粟賑濟會母戴大母趙相繼歿朝夕長號致病遇母忌辰強起設奠一慟而絕年三十三後以子貴贈工部郎中子道素孫承埏並舉進士

馮洪業

按嘉興府志馮洪業號茂達博學能文力敦古誼登萬曆中南閩鄉薦父伯禮客死徒跣扶喪哀感行路樓居遭回祿負母出烈燄中眉顙並焦

徐應奎

按嘉興府志徐應奎字星魯父燿字定溪有隱德避倭林中倭將入有物招之去人以爲陰德之報應奎性孝父病隆冬思食瓜泣禱瓜纍纍臥藁葉下食之愈人呼爲孝瓜爲邑諸生有名從遊者衆子從治昌治皆身教無他師從治殉難菜城應奎哭之已而笑曰真不愧吾子也父年八十一從子文治年九十四子光治年九十昌治年九十一燿與應奎皆以從治貴贈封兵部尙書崇祀鄉賢文治字泰豐萬曆中舉人江西新城知縣秉性剛直人不敢干以私性至孝母感錮疾衣不解帶得良醫徐鳳以痊陞廣東德慶知州告養歸

李正蒙

按處州府志李正蒙字汝明縉雲人萬曆庚辰進士禮部儀制司主事以學行諭教駙馬考滿當選以父老乞終養大宗伯沈公鯉留候數日請命轉本司員外郎毅然曰吾何以美官易愛日之情哉

遂飄然而歸先意承志十餘年如一日布袍角巾恂恂若書生杜門著書手不釋卷有白華樓集

金思範

按山陰縣志金思範字養愚迎恩鄉人母病不能起醫無以療因叩神願以身代見筴立拊膺大慟矢志成狂每日走廟中百千叩首但曰我代我代里人呼爲愚孝子一日夢神語曰汝母得生汝當於某日月終矣驚寤與妻李氏訣曰母壽增我死無憾但奉侍悉托於汝越數日果以疾終李氏事姑益殫劬瘁育二子歷冰霜四十餘年而死萬曆間縣尹予粟帛旌其門曰孝子

馬文賢

按山陰縣志馬文賢字仲孺性至孝貿易以給甘旨父早喪母六旬病劇禱於神不應刲股大創而歿母遂愈萬曆三十二年建坊旌

華士麐

按富陽縣志華士麐字時瑞靈湖里人也生而穎異讀書卽能通大義十五補諸生試輒高等隨父任興國教職卒官扶喪歸葬廬墓六年每食必泣母病籲天刲股以進病立愈立身高潔不詣公府

方伯王畿延爲兒子師及陞任使者求一見不可得其高尚皆此類也萬曆丁巳以歲貢授金華府訓導居官以講學行善爲教絕不屑屑於儀文瑣節未滿考卽掛冠歸僚友縉紳及門下士挽留不得率爲詩文以美之議特祀爲家居杜門好學手不釋卷又六年而卒所著文集若干卷

郭振民

按太平縣志郭振民字德之號東城泉溪人性行淳謹自幼以孝友著嘉靖壬午倭登岸燒民舍時邑未有城不得已厝母柩於西山倭退白父欲扶櫬還家父不許曰柩出而返不利振民泣曰脫有禍患願身受之竟返柩而家與身俱無恙其後拔貢入南雍登萬曆己卯科授江西信豐教授

俞應文

按寧海縣志俞應文字一陽馬坡人幼習舉業克守家法父死禮葬廬墓三年萬曆初邑令旌舉載入憲綱

厲崢

按嵎縣志厲崢西隅人天性醇篤傷父肩勞動棄書日治生產父所事事無鉅細皆以身任父亡絕

意房幃晨昏與母氏相依侍食侍寢二十年如一日也母病籲天割股以療母得以康寧老萬曆十五年歲大祲道殣相望煮粥以食饑人多所全活

葉希學

孫昌

按龍游縣志葉希學幼孤育於母傅既長孝謹備至兄客死撫其三子如己出母卒哀毀垂絕子茂堅亦以孝稱茂堅子昌爲邑諸生竭力奉父父病籲天以身代及不起廬墓終喪靈鵲來巢人人稱孝感云萬曆十六年詔建坊

丘如立

按歸安縣志丘如立歸安籍烏程人天性純孝家貧力學補邑庠生以館穀所入奉甘旨終身孺慕不衰母疾不脫衣冠侍湯藥割股爲餌焚香籲天願以身代母果瘳以壽終萬曆年間御史胡繼升刺史吳文企屢旌其門年七十有八舉鄉飲賓弟律孫復曾孫鏞俱庠生知克光先烈云

章魚

按於潛縣志章魚生而篤孝父邁疾竭力醫救進藥餌必先嘗之居母喪哀泣逾年不輟萬曆三年

本縣申憲旌獎匾曰崇獎孝行

酈民法

按諸暨縣志酈民法字聲我性純孝儀度恢弘萬曆間父元亮上京應選卒於途民法時年甫十三忽夢父語曰我於某日卒卽號泣別母赴京覓信果如夢言遂奔喪歸里人謂其年尙幼有齷指心痛得曾參氏之孝焉後歷仕著績及解綬歸事母竭誠依依膝下十數載居喪盡禮遐邇咸推重云

王永謨

按嘉興府志王永謨字公榮性孝友弱冠游庠屢試高等萬曆戊午有巨盜張三趙山者欲劫其富鄰沈姓以天雨陰黑悞入其家永謨母爲盜所執永謨奔救以身蔽母母得脫而永謨右臂爲盜砍折悵鬱死

潘士鯤

按海鹽縣志潘士鯤字化鵬邑庠生祖姓韓少有至性父疾盛暑晝夜不解帶母朱性嚴事之必極愉婉與弟同爨頗有張公藝陸九韶遺風

孫嘉謀子

按海鹽縣志孫嘉謀之子年十六母范氏病篤割股肉以療母萬曆三十三年事也縣令杜士全太守龔勉並給匾旌其廬

劉永孫

按玉山縣志劉永孫市人母病篤家貧無醫資割股肉活母者數次而祕不令母知有人視其刀瘢班班然咸泣下明萬曆三十八年公舉邑宰具文申報兩院批允按院區委身授母學道區孝行之家

曹鐸

按貴溪縣志曹鐸三十六都人家貧賣草履爲生無以事母母鄧氏病割臂療疾於萬曆三十八年邑令請獎之

吳同春

按汝寧府志吳同春字伯與固始人萬曆甲戌進士知桐川有惠政陞刑部主事守晉陽復舉卓異

尋遷山東學憲再轉鴈平兵備以親老陳情終養

黃亮元

按汝寧府志黃亮元字繼豫息縣人工詩文萬曆戊午舉於鄉性至孝事父母視膳問安無閒晨夕請事跪而言下氣怡色必可而後行母徐先卒廬墓三年父命之始旋每奠薦哀慕如初喪及父繼沒毀瘠愈甚以疾卒

葉茂春

按安慶府志葉茂春字梅崖河內人性至孝少孤失聰疾呼罔聞時時伺母顏色母稍不懌卽不食感肩額爲嬰兒啼母告之故能悉以意解一日母病垂斃納母懷中泣竟日夜母漸甦夢神謂若兒孝奏帝帝錫若兒孝廉三十載養若萬曆乙卯果舉於鄉洎背母時正三紀耳

梁移粟

按衛輝府志梁移粟母疾篤籲天刲股愈之敬事繼母兄長雖撻罵無怨言萬曆間有司以聞給粟帛旌其門

倫天叙

按河內縣志倫天叙以恩貢任瀏陽丞性至孝友母李氏故哀毀踰禮送葬之日結廬墓側每旦則躬操畚鍤取土加墳食必致祭哭必盡哀旁觀者感而泣下卽荒陋爲居粗糲而食隻身郊野之間未嘗幾微動色人有以盜恐之者叙曰吾唯不忍吾親以至於此付命於天死無所恨鄉人欲白之有司叙曰人子爲親豈以要名力止之服闋親友勸諭迎歸於家萬曆二十一年按院聞其孝特加旌異匾其門曰旌孝今列憲綱

陳邦寵

按密縣志陳邦寵由歲貢任山東武城縣丞於父母疾病晝夜榻側躬奉湯藥親沒寢苦枕塊水漿不入口者七日感兄弟八人併守制如禮及葬墓側築廬獨居三年每日抱土封塚哭拜足跡不履城市及出廬凡事如禮率兄弟子姪輩六十餘人共守禮四世同居明萬曆二十二年巡按河南監察御史陳題請曰純孝可嘉有張公藝之風焉奉旨建坊曰孝行之門

按祥符縣志王霖祥符人性至孝居父喪有白鳥巢簷下服闋而去人以爲孝感所致萬曆辛丑舉進士歷官廣東道御史彈擊不避權貴人謂其移孝作忠云

王謙

按汜水縣志王謙槐雲坊人早年游泮父守禮有疾質神代死居喪構思親室獨處三年事繼母陳氏委曲奉養陳惟一女貧謙時爲供給以慰母心歲戊子母病瘟疫謙躬侍湯藥不遑寢處者數十日時亭前冰花結彩蓋孝心所感也其妻方氏事陳亦孝謹著聞則謙刑家之化矣萬曆三十一年欽賜孝行坊旌表其閭按院楊疏請云性生克孝敦本事親養益隆於繼母慕將希乎終身

馮明英

按滎澤縣志馮明英平居事親極孝萬曆十九年父盛時有疾欲食肉英焚香祝天割股造扁食進父食之卽愈邑侯申報道院給匾曰純孝維風

周澤

按商城縣志周澤號古石萬曆時人童年英異性篤孝友人比之黃香其兄洋得罪里黨值行乞死

於道訟之官澤甫十有二歲遂挺身自認抵償蓋以兄年長無嗣耳竟代坐囹圄中二十四年直指鞫得其情感之曰天下有讓國兄弟寧有代死兄弟乎釋之澤善治生業家道日興乃與兄平分焉子孫繁庶科第蟬聯皆其厚報云

賴從周

按安遠縣志賴從周濂江坊人三歲失怙寡母何氏撫之年十六母病求醫無效呼天泣禱願以身代母死哀毀盡禮廬墓三年萬曆四十七年合邑公舉奉府道巡按張獎賞天啟二年又奉府道巡按汪重加獎賞三年又奉府道巡按謝題請賜坊曰敦孝

廖愛栗

弟愛栗

按安遠縣志廖愛栗愛栗長河保人父早逝兄弟事母冬溫夏清不少間斷母死哀毀欲絕泣血三年足不出戶兄弟不忍分家以田產相讓萬曆間邑令何舜齡嘉其孝友皆舉正賓獎曰天倫有樂人道無慚

蒲生汶

按濟南府志蒲生汶淄川人少孤恪遵母命讀書刻苦備歷艱辛萬曆壬辰進士任玉田知縣聞母病棄官歸侍湯藥母亡痛哭幾絕素羸吐血數斗而卒竟無嗣士論惜之

趙大景

按濟南府志趙大景新城人年十四萬曆間有賊欲殺其母大景抱母身捍賊剖腹而死母賴以全

劉嘉引

按濟南府志劉嘉引字繩懿德州人父早逝生母張氏懷妊越三月嘉引生弱冠領萬曆己酉賢書事兩母備極孝養年逾五旬兩母相繼沒哀毀骨立遂以疾卒

魏彭年

按濟南府志魏彭年萊蕪人幼孤事母孝萬曆乙卯山東大饑彭年家素貧事母甘旨不缺日與妻子屑糠粃榆槐食之不忍令母知恐傷其心年三十餘補博士弟子員受徒講學萊人士尊爲師表以子似韓贈文林郎陝西鄠縣知縣

張學詩

按濟南府志張學詩禹城人詩幼未讀書孝義天性父沒負土成墳廬墓三年母沒復廬於墓日負土將墳合爲一塚若巨阜然萬曆九年兩院表之

王與夔

按濟南府志王與夔字風虞新城人象復子萬曆舉人時有變與父俱死抱持竟日不能解事聞贈宛平知縣同父祀表忠祠

張其綱

按青州府志張其綱益都人歲貢生五歲喪父十歲喪嫡母馬氏居喪哀毀儼若成人與生母左氏慈母王氏孤苦相依鄰家失火延燒母室其綱號泣冒火入室負慈母出燎及鬚髮燒足創甚後兩母相繼沒俱三年不茹葷不入室卽行百里亦徒步輿論推服萬曆二十六年題准旌表

孟承引

按鄒縣志孟承引字永孚孟子六十代孫邑所稱孟孝子者也明初時其祖克威以孝義聞嘗修七世墓樹碑焉承引敦樸涉典籍尤熟通鑑是時亞聖墓在四基山者爲水所衝嚙庫甚承引一日祭